

L'acqua dul pòzz.

*Vèen in ment i dì d'agòst
quand ul sù al scüriva la pèll,
ogni massée al sa pruvedeva al pòzz
d'acqua fresca, da scurànn un sidèll.*

*Tric-trac 'mè 'na meludia amisa
strideva la cadéna sül turnèll
'mè 'na puesia, la paar ca la diséva:
va pòrti l'acqua, la vita, par quést e quéll.*

*Sunt chì, sunt frésca in la sidèla
giò un bel fiàa, o brava gènt,
da quand gh'è mund sunt sempar quèla,
la mè cà l'è giò, l'è la surgènt.*

*Mò ul prugrèss al m'ha inquinàa
ul tric-trac dula cadéna l'è sparì,
un quai pòzz scià e là l'è restàa,
cumè'n porta fiuur l'hann guarnì*

*Mò gh'è pü la sidèla, sunt da qualità,
cunt i scadènz cumè la patènt,
ca sia da pianüra o da muntagna,
liscia o ca büscia pa 'l güst dula gènt.*

Carletto BOSSI